



# Պարույր Սևակ

## Լույսի աղբյուրը

Եթե մթության խտացումից է միշտ լույսը ծնվում,  
Մի՞թե մենք կյանքում քիչ մութ ենք ծամել՝ հացի փոխարեն,  
Եվ մի՞թե քիչ ենք քնել մեր քունը մղձավանջային՝  
Մեզ, վերմակի տեղ, ծածկելով մթան մազեղեն քուրձով...  
Մութը՝ անասեղ՝ կարկատանել է մեր աչքե՛րն անգամ,  
Իր գույնն է խառնել և մեր արյա՛նը,  
Կարմի՛ր արյանը,  
Որ չորանալիս սևանում է միշտ,  
Եվ չոր արյամբ էլ սևն է շատանում,  
Այսինքն՝ մութը...  
Անգամ ամեն ծառ,  
Ամեն թուփ ու խոտ  
Կարծես ճոճվում է, որ ավլի մութը:  
Բայց ճոճմամբ իրենց ո՛չ թե ավելում,  
Այլ հավելում են նրանք նույն մութը՝  
Իրենց ստվերո՛վ...  
Կույր ծնվածները բարի են անչափ:  
Կարող է կարծել միայն մարդը չար,  
Թե կույրերն անվերջ աղոթք են անում,  
Որ ընդարձակվի կայսրությունն իրենց,  
Ու թագադրվի մո՛ւթը,

Այդ մո'ւթը՝  
Իրականների մեջ իրականը,  
Տիրակալների մեծ տիրակալը...  
Եվ իսկապես էլ՝ մեր թիկունքն է մութ.  
Անցյալը գիտենք գրքերով միայն:  
Գուցե առավել մեր ճակատն է մութ.  
Գրքերն են ճառում գալիքի'ց նաև:  
Մո'ւթը առջևից - մո'ւթը ետևից,  
Մենք՝ երկու մթան նեղլիկ արանքում,-  
Էլ ի՞նչ է մնում, որ էլ ի՞նչ անենք:  
Պիտի սեղմըվենք աջ ու ձախ թևից,  
Սեղմըվե՛նք անվերջ-անվերջ խտանա՛նք,  
Բայց... չբթանանք այնքան, որ կարծենք,  
Որ եթե մթան խտացումից է միշտ լույսը ծնվում,  
Ապա կծնվի ինքնաբերաբար՝  
Ինչպես Հիսուսը Միածին Կույսից,  
Մինչև իսկ առանց... «Եղիցի լույս»-ի...

09.XI.1965թ. 19.III.1967թ.

Չանախչի, Արզնի